

欽定重修兩浙鹽法志

欽定重修兩浙鹽法志卷二十七

藝文一

鹽法食貨也曷爲其紀藝文蓋自厥貢鹽緡載於書謹正鹽筴詳於子食貨也而

國家經世之大法非文無以行遠矣秦漢而後浙鹽所行未廣文之見於載籍者絕少降及唐宋代有著述於章疏見政治之損益於記序見官方之懋美其他文人撰著凡有關兩浙鹽筴經制可以資考訂備法戒者舊志所缺則增補之舊志所錄而

空言無事實則芟汰之是豈矜詞章之麗藻示卷帙之繁富已哉誠以

聖朝良法美意與前代名臣之所以興利除弊者皆於此可見其梗概柔而輯之固載筆者之職也志藝

文

制

授王播刑部尚書諸道鹽鐵轉運使制

唐
元稹

敕漢諸儒議鹽鐵者百輩終莫能罷以其均口賦利則

貴賤盡徵於王府矣而國家歲漕關東之粟帛以實京師亦重事也并是兩者世弗居劍南四川節度副大使知節度事中散大夫檢校戶部尚書兼成都尹御史大夫賜紫金魚袋王播昔我憲宗章武皇帝梟琳於夏擒闢於蜀縛錡於吳而又繼之以元濟師道之役十五年間蓋繁費矣然而資用饒而人不加賦朕甚異焉謀及耆艾以求其故皆曰蜀帥播是時司筦樞者八年忠而能勤善於其職先皇帝咨訪委遇用之不疑下竭其才而上專其任也是用徵自益部授之刑曹復以舊務

煩之式所以藉爾奉力之熟耳於戲知人則哲憲考能
之顧茲不明敢有二事爾其奉追先眷佐予沖人忠盡
始終以服休命可守刑部尚書充諸道鹽鐵轉運等使
散官勳如故

許懋爲兩浙轉運副使制

宋曾鞏

敕具官某朕擇遣使者分部而治雖以將漕爲稱然實
總民政之舉措察吏屬之能否蓋連數十城之地舉而
屬之其選豈不重哉爾詳練敏明宜服予采蓋爾之職
非止於督賦斂斷獄訟而已惟除苛熄擾可以使民遂

其宜惟務實去華可以使吏馴其行宣恩德而美風俗
待爾能善其官可不勉歟以祗朕命可

兩浙轉運副使許懋可令再任制 宋 蘇 軾

敕具官許懋吳越之人凋敝久矣朕方蠲理繁碎以安
養其衆非得循吏察視郡縣均通有無則民何賴焉以
爾儒術精通吏事詳敏歷年於茲民便其政旣信之俗
必易爲功庶無新故更代之勞而有上下相安之美勉
修前業無怠日新可

蔣璨兩浙運副梁澤民江西通判米友仁浙西提

舉茶鹽鄭僑年江東提舉茶鹽王榕江西提舉

茶鹽制

宋劉一止

敕具官某朕經理中原費出尚廣惟是四方賦租之入
山澤之利以佐大農部使者實總其事故於選任之際
所不敢輕爾璨通練敏明聞於朕聽爾澤民莅事不苟
屢試有稱其爲朕服輸將之勤勿愆於素爾友仁爾僑
年爾榕術業之茂咸有可觀通貨阜財惟爾之責其祇
若予訓懋乃職守罔曰不克惟旣厥心書之戒也今朕
亦云可

左司員外郎姚舜明直龍圖閣江淮荆浙等路發

運副使制

宋程俱

敕具官某國仰六路之漕輸給中都之貨食既以責之
部刺史又以制置使者總之以時其漕輸緩急低昂懋
遷之宜時巡以來雖事異平日而稱是職者亦難其人
以爾才術疏通踐揚中外比於帥幕召賓都司還直龍
圖雖云舊物維新命以重使華無或病民勉思裕國可
表

請弛鹽禁表

魏甄琛

王者道同天壤施齊造化濟時拯物爲民父母故年穀不登爲民祈祀乾坤所惠天子順之山川祕利天子通之苟益生民損躬無吝如或所聚唯爲賑恤是以月令稱山林藪澤有能取蔬食禽獸者皆野虞教道之其迭相侵奪者罪之無赦此明導民而弗禁通有無以相濟也周禮雖有川澤之禁正所以防其殘盡必令取之有時斯所謂障護雖在公吏所以爲民守之耳且一家之長惠及子孫一運之君澤周天下皆所以厚其所養以爲國家之富未有尊居父母而醯醢是吝富有萬品而

一物是規今者天爲黔首生鹽國與黔首障護假獲其利是猶富專口斷不及四體也且天下夫婦歲貢粟帛四海之有備奉一人軍國之資取給百姓天子亦何患乎貧而苟禁一池也古之王者世有其民或水火以濟其用或巢宇以誨其居或教農以去其饑或訓衣以除其敝故周詩稱教之誨之飲之食之皆所以撫覆導養爲之求利者也臣性昧知理識無遠尚每觀上古愛民之迹時讀中葉驟稅之書未嘗不歎彼遠大惜此近狹今僞弊相承仍崇關廛之稅大魏恢博唯受穀帛之輸

是使遠方聞者罔不歌德昔賈父以棄寶得民碩鼠以受財失衆君王之義宜其高矣魏之簡稅惠實遠矣語稱出納之吝有司之福施惠之難人君之禍夫以府藏之物猶以不施而爲災況府外之利而可吝之於黔首且善藏者藏於民不善藏者藏於府藏於民者民欣而君富藏於府者國怨而民貧國怨則示化有虧民貧則君無所取願弛茲鹽禁使沛然遠及依周禮置川衡之法使之監導而已

請檢校鹽鐵表

唐劉彤

臣聞漢孝武爲政廐馬三十萬後宮數萬人外討戎衣
內興宮室殫費之甚實百當今而古費多而貨有餘今
用少而財不足何也豈非古取山澤而今取貧民哉取
山澤則公利厚而人歸於農取貧民則公利薄而人去
其業故先王作法也山海有官虞衡有職輕重有術禁
發有時一則專農二則饒國濟人盛事也臣實爲今疑
之夫煮海爲鹽採山鑄錢伐木爲室農餘之輩也寒而
無衣饑而無食傭賃是資者窮苦之流也若能以山海
厚利資農餘之人厚斂重徭免窮苦之子所謂損有餘

而益不足帝王之道可不謂然乎臣願陛下詔鹽鐵木等官收其利貿遷於人則不及數年府有餘儲矣然後下寬大之令蠲窮獨之徭可以惠羣生可以柔荒服雖戎狄猾夏堯湯水旱無足虞也惟陛下行之

浙東提舉到任謝表

宋 熹

宣敎郎直祕閣提舉兩浙東路常平茶鹽公事臣朱熹上表臣言準告授臣前件差遣填見闕臣已於今月六日就本路蕭山縣交割職事訖者擢於偏壘付以外臺便道造朝單車詣部延見父老問其疾苦之因宣布詔

書諭以丁寧之意榮逾望表懼溢情涯伏念臣生長田
間棲遲林壑居然樸拙見謂迂疎潛心切慕於師承行
已敢干於義命會逢聖旦參預時流驟自草萊起分符
竹乾坤大德施且不貲螻蟻私情報於何有屬歉歲民
無艱食謂愚臣職有微勞寵之冊府之華畀以近畿之
節雖駑馬之十駕後者鞭之然鼯鼠之五窮技止此耳
毋乃累公朝之選重以爲多士羞茲蓋伏遇皇帝陛下
闔舜四門馭周八柄欲尺寸之長並用致辱微之品亦
收比奉對揚親叨臨遣大明委照不棄負薪之言零露

疏恩更下賜緡之令顧愛所在稱塞爲難臣惟當恪意
講求因時施舍不能則止戒小已之便文當官而行效
古人之報國庶殫毫末上答邱山

代兩浙轉運使謝恩表

明 徐一夔

欽奉聖旨除臣兩浙都轉鹽運司使臣某謹奉表稱謝
者伏以聖恩下被寵耀有加拜命若驚臨職愈懼臣自
揆疎賤幸遇聖明嘗忝備於使令遂蒙任以轉輸自淮
遷浙已經五載之餘由初及今未有一絲之補常懷兢
惕每賜優容詎意垂老之年超授三品之秩竈之已至

分則實踰茲蓋伏遇陛下量包八紘若海涵而春育澤
及萬物如天施而地生均罔大造之中獨荷曲成之賜
臣惟當堅持晚節恪謹官箴式殫方寸之忱少效涓塵
之報無任感恩戀闕之至謹奉表稱謝以聞

書

減鹽價書

元葉知本

臣聞漢宣帝詔曰鹽民之食而價咸貴衆庶重困其減
天下鹽價漢時鹽價遠不可詳臣以爲必輕於唐也唐
之鹽價天寶至德間斗鹽十錢是兩文銅錢一斤自祿

山叛亂天下兵興肅宗命第五琦轉運江淮財賦始變鹽法斗鹽增作一百一十是二十二文一斤至德宗急於聚斂相盧杞用陳少游加賦於民斗鹽增至二百七十召天下之民怨啓朱泚之亂階此則陳少游之罪也順宗初立即減鹽價憲宗又減大貴不過五十文一斤宋之鹽價比唐尤賤斤鹽八文貴至四十七文而止唐宋用兵仰鹽供給其價不得不貴今天下一統四海息兵無宿師轉餉之費萬邦貢賦俱入王府無用度不足之憂而爲政者但思今日增鹽額明日增鹽價必欲困

竭江南之民財斲喪國家之根本臣不知其用心何如也歸附之初鹽價中統鈔十二貫一引該錢三十文一斤至元十五年初定鹽額兩浙運司歲辦作二十二萬引當年辦至中統鈔二萬四千八百六十餘定至元二十四年桑哥作相減里虛擡鹽額作四十五萬引包辦以此諛罔朝廷營求運司此時兩浙人民尚富減里到任肆其威虐止辦得三十四萬八千餘引得中統鈔一十一萬八百七十餘定次年蒙都省明見減里虛誕奏減一十萬引定作三十五萬引爲額以鹽價言之自十

二貫爲始一次增作十五貫第二次增作二十五貫第三次增作一定矣唐時江淮鹽課四十萬緡代宗用劉晏善於經理初年二百萬緡至大歷年間歲得六百萬緡當時天下租賦歲入一千二百萬緡而鹽利居半六百萬緡準今一萬二千定也除淮鹽一百萬引外臣只以浙鹽言之已收唐時三倍之利比德宗時一歲租賦已有九百萬定之多至此亦可止矣大德年間又增鹽額十萬引又增鹽價十五貫至大四年又增鹽價十貫續又增二十五貫通作一百貫一引是官價二百五十

文一斤也較之唐宋最重之價增多四倍民何以堪價
既取二百五十文一斤官豪商賈乘時射利積場待價
又取五百文一斤市間店肆又徵三分之利故民持一
貫之鈔得鹽一斤賤亦不下八百瀕海小民猶且食淡
深山窮谷無鹽可知陛下登極聰明睿智遠覽古今天
下臣民想望至治臣意前日聚斂之臣所爲害民之政
陛下必能革除以結人心固邦本也皇慶二年忽又增
兩浙鹽額十萬引差撥竈戶害及附場百里外之民怨
忿亡身者有之延祐二年又增鹽價每引一定臣不意

陛下以聖明之君而左右大臣猶行此剝民之政也使臣遇德宗盧杞之時臣不敢言今陛下聖學高明獨不能如漢宣帝乎此臣所以惓惓有言臣願陛下痛減鹽價使天下之民皆無淡食之苦然後選任運官設檢校所限官豪買引復附場百里賣鹽另置魚鹽局以便海島小民均撥灘場柴蕩以優恤新撥竈丁如此處置皆太平快活條貫也願陛下行之

疏

鹽法疏

明
鮑
輝

朝廷齎敕前去整理非徒欲鹽法疏通實欲庶民乂安也近者臣起服自浙江經過竊見各府縣將軍民之家不分老幼計口按里造冊一口每月定買官鹽一斤每斤定價米三升其鹽客不離本場將鹽包擡赴縣所或寺觀各處著大戶將鹽分與各戶納米之時加倍交收甚至大戶將鹽剋落迫人虛納者有之又有收米而索要足色現銀者有之府縣造冊積滿欠逋家家措辦鹽米迫於筮楚且田野之民窮乏者多致令缺米難以延生雖苦無鹽猶可度日若使每月計日出米是括民間

老稚之儲供吏胥厭飫之口況浙江一路去年水患尤甚民方接踵以告匱乏加之鹽米科擾益增其苦欽惟皇上臨御以來屢下寬卹之詔無非與民生理也誠恐各府州縣皆有前弊必致逼民逃竄深有負於皇上拳拳愛民之意臣愚以爲鹽法不能疏通者由強徒私販船隻禁絕未盡故也若附場之小民手提肩負十斤以下不出二三里之外易米充饑者亦不爲害乞勅下該部轉行各處巡鹽御史務於通津及偏僻埠頭去處徧歷體察禁絕私鹽船車出沒其官鹽聽民自買不許計

口仍前分散科擾則非惟黎庶蒙安養之恩而鹽法亦無雍遏之患

通鹽利以給邊用疏

明林誠

臣惟各邊軍餉多賴天下產鹽地方近者鹽課虧兌私鹽甚行商鹽阻滯各邊無人上納致使邊儲頻於告匱畿甸苦於轉輸有乖立法本意臣按兩浙仁和諸場鹽課缺商報中積滯有三二十年者自景泰五年至成化元年各邊中剩餘鹽戶部節有勘合付浙江布政司招發開賣爲其年遠故定價小引一錢四分有一錢七分

者除賣過猶剩鹽六十六萬六千四百九十引臣已設
法召商中賣解部臣復查成化二年至今成化二十年
課鹽除各邊及浙江已賣者猶剩小引鹽二百七十六
萬五千餘引若候各邊報支又是二十年之數而其原
鹽囤積倉廩者滴消殆盡其折價總催收領者死亾亦
多必致低價賤賣反累竈丁賠還而軍民兩失臣成化
四年差往長蘆巡鹽因鹽法不行備查因時減價中賣
緣由具揭都察院轉行戶部蒙差郎中李璵會同臣定
派場分估賣銀兩解部今各邊見缺糧餉臣亦欲將兩

浙自成化二年至今二十年鹽課分作五年仍在浙江開賣計每年得價銀四萬餘兩可以陸續取給邊用於時臣又爲長蘆鹽課積滯奏准已將鹽課一年折納布疋爲各邊軍士冬衣今臣亦欲以兩浙成化二十一年以後鹽課內除水鄉竈戶折銀其餘一年亦折納銀如浙西場鹽利稍重者每正鹽一引折銀七錢浙東場鹽利稍輕者每正鹽一引折銀五錢其銀逐年十月以裏完足解部計每年見得價銀亦有五萬餘兩可以陸續取給邊用庶使鹽利漸通邊儲漸實矣

禁革姦弊以疏鹽法疏

明史簡

一減勸借查得正統年間御史張襄奏守支商人情願者不拘米麥量力勸借收積在官協濟貧竈此乃一時權宜初無定額後遵爲例不分年歲遠近鹽課有無每鹽一引勸借米一斗有鹽關支者固爲甘心其買補者旣無鹽支又納賑濟實是無名況姦商旣支見鹽又賄有司告納抵斗而買補者反先納米麥甚是不平乞令守支商人全支者全納賑濟支五分者上納五分支三分者上納三分俱照舊每引納米一斗或小麥一斗五

升自買補者免其上納如是糧料不敷竈丁缺食卽發
官倉賑濟庶貧竈受惠而商困少蘇矣一黜姦頑查得
擅鹽工腳洪武間俱民間僉充有作弊者多遷發充軍
爲民彼時一戶止是一丁應役其餘俱有司差科經今
年久父子兄弟舉家在場影射民差挾詐商人把持官
府商人支鹽出場俱索常例銀兩甚至交通官吏謀領
批票假以催鹽擅將竈丁鎖打遇貧竈將剩鹽易換口
糧輒稱私賣勒取錢物多逼逃竄害人作弊莫如此輩
乞將各場工腳驗丁僉補逃故竈丁名缺俱令辦納鹽

課或盡數發遣有司當差其有田產屋業在場者悉令變賣不許在場攪擾仍前者依律例問發其工腳於附近州縣均徭人戶內僉點一年一換止許擡鹽看倉不許給批下竈則商竈免其侵擾而姦頑知所警懼矣一定科差查得舊例煎鹽竈戶一應雜差派買顏料及解軍等項照例優免其該納稅糧照舊存畱本處倉分交納遇有拖欠聽從糧長里甲催辦若爲盜賊事重許令挈問其餘詞訟不許徑自下場勾擾果與軍民干對者宜從申達巡按巡鹽御史理斷及轉行運司提解發問

近來有司多不遵守將竈丁或僉點解軍等役或小事一概勾擾或稅課借湊起運間有存畱卻又加收耗腳以致竈丁逃移鹽課虧欠乞准竈戶不拘豐歉該辦稅課存畱本處上納本色量收加耗不許借湊起運如有縱容多收耗腳及差人下場催逼逃竄者聽巡鹽御史拏問一應詞訟除盜賊人命重事其餘亦不許輕自拘擾有與軍民干對者轉行運司約問如違亦治以罪則竈民得以盡力煎辦而事體歸一矣一鑄鐵盤照得各場煎鹽鐵盤俱係洪武永樂間鑄造年久破壞雖屢奏

鑄率未有成每遇旺煎時月各竈輪煎多被富豪久占
貧竈不得間有自鑄鍋盤又被多人挾詐力雖有餘器
具不足鹽課由此虧兌乞將運司贓罰紙價銀內令查
數拘集經紀人匠依時價買鐵鑄造如銀不敷以各批
驗所變賣私餘鹽斤價銀量爲支用否則分爲兩次鑄
造陸續發場煎燒則竈民得以盡力而鹽課可以足數
矣一修河塘照得各場俱有河道先年遇有淤塞隨即
疏浚故舟楫通利近修不以時及附近豪民有因灌漑
走泄水利有因私販挖開港口致使商竈發運草束俱

用牛車腳價倍費又海潮不時漂沒房屋盤舍人馬牛
畜鹽課消折不可勝計且田地一經潮水五穀不生草
柴稀薄實爲大患乞令運司同各府官將各場鹽運河
道并海潮淹沒去處逐一踏勘某合挑浚某合築塘候
農隙及住火之日量於附近州縣起撥人夫挑濬修築
必爲久計則商民便而鹽法行矣一時開中鹽課有存
積常股之分而中支有輕重緩急之等存積之鹽係現
在之數其價重於常股而放支不拘資次常股之鹽係
叫派之數其價輕於存積而挨次放支近來不遵此法

無間年歲遠近存積常股鹽課有無事平之日一例減價開中致使勢豪姦商用計買求所司中派有鹽場分齎引到場有全支足數者有支六七分者有支四五分者本分商人斤兩無支所輸之價雖同所獲之利二一故商人不肯上納射利之徒又勒減價值必致大輕方纔投報以致官課虛耗邊餉無饒乞令今後開中鹽引仍照先年事例分別年歲遠近存積常股鹽課有無斟酌價值各使均平仍要挨年開中盡絕使易查考其成化二十二年以後見收實在鹽課不宜輕易開中存留

以待邊方急缺糧料之日召商中買其斗頭價銀亦要
臨時計定庶官價不虧而事急有濟一均草蕩照得鹽
海之利所資者草蕩竈戶每丁歲辦大引鹽十引該用
草二千餘束洪武年間編充竈丁每丁撥與草蕩一段
令其自行砍伐煎燒不相侵奪近者草蕩有被豪強軍
民總竈恃強占種者有糾合人衆公然採打貨賣者又
有通同逃移竈丁捏作荒閒田土立約盜賣者其所出
之價甚少而遞年所得之利甚多既不納升合之糧而
竈丁取贖者反被虛詞假契買雇積年刁潑證人屬託

貪婪官吏以行告害其有司又不審查輒差人勾掣淹禁經年累歲不得歸結致使草蕩日見侵沒鹽課愈加虧兌乞令選差公正廉能官員督同該運司各掌印官拘集各該軍民竈丁查究先年勘撥文卷逐一踏勘不分占種盜賣俱免追取花利及應問罪名悉令盡數還官仍上立封堆下置灰橛以爲經久清理完日就將納鹽無蕩竈丁照名分撥管業給帖執照其餘存畱以待招撫逃移或聽自守曠丁聞知必將爭先復業認辦鹽課而課額不虧矣

整理鹽法疏

明李嗣

一稽囚徒以充鹽課體得各場竈丁往往夾帶餘鹽及私煎貨賣事發官司依律例問發本場照徒煎鹽另項結課此等囚徒不下數千並無一人完納虛數挂場官攢不敢比并深爲鹽法之害今乞將總催竈丁有犯徒罪并加役等項每日煎鹽三斤通算若干折作引鹽若干比水鄉竈戶事例每一小引追銀二錢通數解京則事易了結總竈不敢犯法矣一立查同以革刁蹬訪得商人中鹽將倉鈔赴運司告投派場關支有到場一二

年或三五年不得支者官攢總催執稱無鹽任其索詐
今宜曉諭該支客商如有見鹽運司具查同引目手本
付商齎巡鹽御史告投比對相同親筆立限委分司官
限幾日完繳過期就提問罪則人不敢刁蹬商人蒙惠
一立通關以防詐僞查得各場總催竈丁所辦鹽課逐
年止納十之七八餘皆不完監臨比并緊急運司俱作
完足通關繳報別委查盤又將拖欠開爲虧折年年未
見追補間有亦是准折物貨自宣德以來上下習以爲
常扶同虛出奏繳最壞鹽法今乞除已出通關外自成

化二十三年爲始每一總催運司各出通關一紙如有
司徵收故事編立內外號簿用印鈐蓋齎付分司發仰
各場如某總課完官爲查驗明白別無虧欠照名填繳
其不完者追比完日照前出結其或盤詰無稽類報不
實通同作弊者聽巡鹽御史究治其所司官與分司官
額課至次年六月不完者降一級運司六年不完者如
之當場官吏總催各照重律處斷則上下警懼而詐僞
之端自息矣一定鹽固以便查盤竊見各場總催鹽固
大者四五千引小者不下一千不分常股存積俱用木

牌開寫插在國邊官攢聽其那移出納客商被其刁蹬
取銀二司難以稽攷今宜每場鹽囤地方以東西南北
爲界南北爲門爲路東堆存積西堆常股定立石碑每
囤止許一千引如總催名下有一千五百引者一千爲
大囤五百爲小囤以便查盤所收之際先儘存積足數
方收常股一年旣完方收下年委官查盤務要逐引稱
數不許丈量堆垛則存積有見邊儲可充矣

條鹽政疏

明 沈 淮

一查給工本洪武中每竈一丁給與工本鈔二貫六十

文以備器用以給口食當時鈔一貫可易米二石自鈔
法廢弛所謂工本者名存實亡臣觀沿海沙地及水深
長蕩舊制畝稅鈔六十文竊意所給工本蓋此鈔也今
諸場不復徵鈔已改收平米三升或五升官旣可以米
而易鈔竈獨不可收鈔而給米乎乞查改徵蕩米照依
原定鈔貫算給竈戶以充工本則器用備口食周民樂
輸無怨矣一勘給草蕩灰場舊法竈戶皆有附近草蕩
以供煎鹽柴薪約計所收價值可抵今一丁鹽課之半
其後場司以竈丁屢易不復撥與俱爲總催豪右侵占

或開墾成田收利入已仍於各竈名下徵收全丁額鹽
夫既無工本又無柴薪使竈丁白撰輪鹽立法初意豈
若是耶又聞各場竈戶多無灰場往往入租於人始得
攤曬夫灰場者產鹽根本與草蕩皆丁之命脈也乞委
所司追取宣德正統以來草蕩舊數踏勘明白照丁撥
派明立界限以防侵奪竈戶無灰場者官爲處置給與
無使重納私租夫有米以爲之工本有蕩以給其柴薪
而攤場又無納租之累如此而流亾不歸鹽課不充無
是理也一分別濱海水鄉濱海竈戶謂之漚丁男婦俱

諳煎曬倚以爲生雖勞不辭其水鄉遠在二三十里之外原因濱海丁闕僉以補之然業非素習強而使之終無益於事也以是舊例水鄉每丁貼助滴米六石或四石代與辦鹽每歲滴丁到鄉陸續收取雖云貼米錢布雜物無所不受出者不覺其難收者各得其用甚良法也其後鹽司定立千百長名役令收水鄉鹽價騷擾侵漁而人始不堪矣知府樊瑩憫其若此請以鹽價均入秋糧帶徵起解原撥蕩價亦與各場徵收於是鹽課不虧逃亡復業後因濱海竈丁消耗復用水鄉僉補強者

規避而免弱者受侵而逃雖有補竈之名殊無辦鹽之實訪得沿海居民原非竈籍而私自煎鹽者往往有之乞勅所司今後滿丁逃亾者卽以此等居民僉補或犯徒罪發充竈丁比之重役水鄉有名無實相去遠矣一停止折徵成化間因各場無鹽給客每引折與銀三錢比之中納其利十倍巡鹽御史林誠以爲歸利於商孰若歸利於國奏將竈丁鹽課一半折銀解京一半存場給客兩浙鹽政自此而大壞矣夫竈用以煎鹽爲業不徵鹽而徵銀鹽非私鬻何自而得銀哉旣以私鬻得銀

則興販之徒不召而集況初給價銀非皆本色又且非時竈丁貧者或先事而逃催日在者率并爲倍納歲消月磨無慮十減六七矣欲利反害無甚於此伏乞特勅運司自正德元年爲始停止銀兩照舊徵鹽則竈丁蒙惠養之仁而私販之徒亦無所藉口矣一禁革賣引凡支鹽引目不許中途增價轉賣舊例也近歲商人不利關支而利售賣中鹽無名則駕之曰合本賣引有禁則諉之曰分撥所賣之引無關支者又許買補連結牙行公爲興販夫引旣非其本名鹽又不由倉領不謂之私

販而何又有豪猾之人假託權勢支領之際任自爲主或并包夾帶私鹽或落價折準庫物官吏備其聲威催日受其凌虐乞自今凡遇開中委御史一員專察凡監臨官吏詭名及勢要之人冒禁上納者許令究問商人則令供報子姪或兄弟在官以便盤詰有仍前私賣及假託者依法問罪鹽貨入官其所中納係存積者支與見鹽係常股者亦急與催辦無令久候以啓倖心一存恤竈丁夫刮沙汲海炙日熬波天下之工役未有如竈戶之勞者蓬首墨肌灰臥糠食天下之人民未有如竈

戶之窮者加之有司與鹽司分爲兩家鹽司曰吾之竈也知督鹽課而已有司曰吾之民也知徵賦稅而已其督鹽課者雖百方箠楚有司不問也其徵賦稅者雖百端取索鹽司不知也況濱海土地類多沙積比之水鄉沃土大半不侔有司概與水鄉同加耗米至點均徭亦不分肥瘠一例出銀查得浙江錢塘海鹽竈戶各告巡撫都御史蒙將竈丁全戶正糧並折金花銀兩錢塘海鹽與華亭上海同一浙西地也乞勅所司比二縣事例將濱海竈丁量爲存恤訪求先年事例設法賑濟其餘

一應雜泛差徭悉與除免庶幾濱海窮民無他係累得以畢力事功雖勞不怨矣

修舉鹽法疏

明師存智

一定賦稅以均輸查得兩浙原定課鈔浙西小引三錢浙東小引二錢通計每引可得二錢五分邊方開中每引幫減至一錢八分或二錢一分蓋因跋履險阻故也至於兩浙地方開賣或至三錢或至三錢五分其價不爲不多商人尚願輸此而不欲輸彼此誠上下均一之法近年事體紛更遂使腹裏亦同邊價正空若出一轍

虧填額課莫此爲甚乞查舊規或照新例存積常股各有定價空剩私餘亦有常數如此則賦稅均一而官商兩便矣一清灘場以杜爭競竈戶所管灘場每爲豪強或以近而侵占或以債而准折或強奪爲產業爲開墾爲田園遂使煮竈無資煎鹽失利節有奏辯勘合姦頑視爲尋常官攢被其連累運司莫敢誰何豈非以法輕而犯易故耶乞行令各該有司委公正官員會同運司調取民竈二冊從公查審勘報以文書到日爲始三月以裏自首改正與免本罪并免追徵花利照舊撥與竈

戶若有典當算足花利亦歸原主若年淺花利未足認還價銀取贖若過限仍占就將所占丈量檢有主撥給外餘剩追花利入官軍匠舍餘除正身依律例問斷其餘并民仍查拘親男或三丁五丁一并報官原係催竈亦要加丁當竈辦鹽如此則灘場可復而竈得存活矣一查舊規以佃竈困凡竈戶一丁至三丁者每丁免田五十畝四丁至一十丁者每丁免田三十畝十一丁至二十丁者每丁免田二十五畝二十一丁至三十丁以上者全戶優免俱歸有司當差催徵稅糧存畱本縣免

其起運雜泛差役盡行優免近有司官不肯存恤遇造黃冊任憑吏書脫竈爲民詭寄影射雜差一概拘攝錢糧朦朧科取甚者竈戶滴丁全不造報致使一身兩役賦外加賦各該府分會同運司通拘里老人等調取竈黃二冊若有前項情弊就將妄報詭寄加徵橫派之人均爲賠補當差辦課候大造改正仍問罪枷號但有仍前不與除豁混造五戶以上者里長人等問擬充軍州縣正官至五十戶以上亦擬才力不及起送別用如此則貧竈可恤而額課亦辦矣一割附餘以均利查得兩

浙掣鹽除正引及包索外多餘之數就令商人納價而斤重不許過三百斤違者照例問罪入官而所納價銀亦各有等嘉興批驗所五錢杭州所四錢五分紹興所四錢溫州所二錢合計亦有今定開賣餘鹽四錢三分之數年終類解戶部轉發給邊亾何法久弊滋人漸虛僞就商給價者而朦朧受隱之弊興割候召商者而豪貴垂涎之念起失利於商人其病猶可染指於豪門其害不勝乞令不拘多寡從公估價變賣成就令本商照數納價銀兩運司年終類解發邊則不但官得坐收厚

輸而豪亦無轉販矣一兼隸攝以集事運司官秩不爲不尊所司不爲不重況竈涵雖統於運司而錢糧辦輸於州縣雖常行文拘攝任意耽延莫敢誰何故常據呈查提安得事事兼理以致墜累官課多被住俸叅提縱有才能官員不免低首喪氣乞或量加兼管或照各府行事凡於產鹽地方民竈雜劇去處如府之馭州州之統縣事有未完亦得叅提官吏住俸杖并則統屬知警鹽課易辦矣

條鹽法疏

明 成英

一重用引近年兩浙商人多於正鹽用引其報中買補空餘私因雜鹽皆不領引以圖自便久將賄賂官吏擅給印票弊端日甚及鹽足猶不候掣徑到行鹽地方以微厚利其間夾帶影射漫無紀極乞行各司不論空餘私因雜名悉照正例領引仍填註引背類填單帖水程給付使商人各便支掣以通貨賣其在官司者尤當嚴截引角轉繳類解若有鹽無引雖執印票亦以私鹽罪之官吏不舉並以枉法斷一禁老引舊制商人領引到場千引以上者限五年以下限三年違限者追沒之邇

者姦商始也數百引爲據招集竈徒私煎私販影射出入歲月弗填引角弗截輾轉貿易甚者交通吏徒欺侮恣肆乞令凡遇商人告投引目單帖到場卽以商名年鹽引號到日報司及察院或他該管者以商至日爲始據例計引限日出場如千引以下者一年當得三百三十三引有餘千引以上至一萬者一年當得二千引仍於出場之日驗鹽封引送所聽掣月終以已出場商名年鹽引號報司及察院或他督鹽者有犯者以舊引影射鹽貨之罪罪之其官攢犯賊者爲枉法無賊者亦重

金匱要略卷之二十一
懲治運司不舉治者亦叅奏其商人轉賣遷延不至場者亦罪之歲終巡鹽御史稽諸場所至商若干人何月日至某號起止已出場者若干未出場者若干爲冊籍以相覺察則老引之姦自肅清矣

立簡便以收鹽利疏

明 胡世寧

臣聞各邊軍餉多賴鹽課近惟河東鹽官自賣銀最爲利便其淮浙鹽自來召商中納但今法久弊生商中不便事有多端臣請備述鹽引直價數多商中納糧數少勢如民間二月賣絲五月糶穀急圖應用貴物賤售一

也中納之時勢要買窩姦豪作弊所納糧料類非真正
邊儲不得實用二也鹽易消化聽支日久催目未免多
收竈丁數倍加納日累貧窮鹽課虧欠三也客商中鹽
納官錢糧雖少經歷衙門私費使用則多暨後守支則
壓於勢要臨賣則滯於私鹽甚有父死子代而未得支
鹽財散人亡而未能還鄉者彼既失利後有召中恐不
卽來勢當減價失利愈多緩急難倚四也商利既微類
多夾買餘鹽及勢要中鹽鹽徒私販朝廷爲彼三事設
官秤掣委吏巡捕甚者欽勅大臣爲此整理而三者卒

不能禁下至秤手邏卒旁午紛紜徒增民擾五也私販之徒貪利畏捕沒海沿江招引逋逃窩納盜賊出持兵器歸肆搶奪官軍邏卒莫敢撓鋒此勢不散臣恐淮浙切近南都又臨運道復有黃巢張士誠者出於其間六也古遷豪右填實塞下今山陝富民多爲中鹽徙居淮浙邊塞空虛七也惟此七弊所當區處臣查得淮浙水鄉竈丁每鹽一引折納價銀六錢或四錢又聞客商中鹽邊儲每一大引不過價銀三二錢是鹽課收銀比之收鹽待中得利加倍也又聞竈丁畏鹽難納多願納銀

近年兩浙鹽課內將一半折銀民情稱便臣愚乞勅戶部計議合無今後准浙鹽課通令從便折銀其銀數乞照水鄉舊價而略減比商中糧價而稍增酌爲中制定立每鹽一引納銀幾錢遞年立限徵收解邊糴糧或如臣前所言准作俸祿價銀卻換彼處糧米派作邊儲仍查客商鹽引未支若干盡撥各場或從願改撥長蘆鹽賤處所許令每鹽一引自買私鹽二引或三引准作官鹽發賣各場置集凡竈丁有鹽客商有引者會集一所委員監買仍令把截臨場總路不許零碎私賣期以一

年或以二年通買完足卽絕商中以後竈丁煎鹽聽令自賣或轉賣與客商其出外販賣者止於州縣給引限以地方不禁私鬻貧竈無力煎辦者卽撥富竈餘丁或僉有力願煎及有罪該徒之人而代之如此立法則國家得鹽利自多而不必多方整理竈丁得煎鬻自富而不必更免糧差鹽可通賣人無爭奪勢豪專利之弊不禁而自息山陝射利之民可驅而漸歸邊境漸實邊儲漸充巡邏秤掣之官不必設鹽徒意外之患不必虞待後日久事定鹽課歲額止令州縣徵解而理鹽衙門漸

可裁減其爲公私之便省上下之費蓋不一而足惟聖明採納幸甚

通鹽法疏

明周用

伏查蘇州府所屬太倉州崇明崑山常熟等縣南連松江府浙江海鹽一帶近海沿海居民專一興販私鹽太倉又當江海之交尤易招集流亡越境私販准鹽侵占浙西行鹽地方以致松江分司虛設衙門日就倒塌但存荒基私鹽既行徒黨日衆若先年施天泰等近日王班頭董琦等始則圖利販鹽既而結黨行劫又至出海

通番爭利互相讎殺雖旋加勦除然禍根終在原其所
自實由聚眾販鹽失今不爲之處將來地方之害未已
處之之法在浙西鹽貨流通餘鹽皆有下落使鹽徒解
散方爲有益緣照各鹽場俱有鹽課定額除浙江嘉興
分司外松江分司鹽場俱係松江府屬華亭上海二縣
地方華亭縣有浦東袁浦青村青浦四場上海縣有天
賜下砂并一場三場亦四場共計八場內除青浦天賜
二場坍海外實該六場大約每年額課每一大引與每
小引二引折一大引各四百斤共該五萬五千四百四

十五引九十八斤零每引折銀六錢每年解部課銀一萬五千一百四十餘兩其轉解運司本色折銀一萬五千四百二十餘兩內該二縣水鄉竈丁無徵鹽課銀七千五百八十餘兩俱於二縣秋糧內包補華亭縣包補四千三百二十餘兩上海縣包補三千二百五十餘兩前項鹽課俱係竈丁出辦其自煎餘鹽却不許變易前項無徵課銀俱係二縣民戶包補其竈丁餘鹽亦不許轉賣食用餘鹽既不許賣官司又不如先年給價收貯若不私相轉販餘鹽將何下落竈丁將何養活竊見議

鹽法者皆稱商鹽宜通私鹽宜塞多方設法日新月盛其實商鹽未嘗不塞私鹽未嘗不通然商鹽之塞是官府自塞私鹽之通是官府自通緣商鹽以引目爲名利在買求夾帶及不繳退引官司以盤掣爲名利在縱容夾帶又不追退引所以商鹽但求苟免捕獲其實滲漏影射居多故謂商鹽未嘗不塞其官司巡捕私鹽一向通同作弊家至戶到俱食私鹽故謂私鹽未嘗不通鹽法至此豈惟商鹽不通并商鹽亦俱變爲私鹽止多一種各處私販鹽徒相聚爲害難以處置所以處置專在

餘鹽且竈丁煎鹽辦課卽是民戶種田辦糧民戶辦糧
餘米聽其變易惟竈丁辦課之外餘鹽卻作私鹽一切
有禁況鹽貨實出天地自然之利竈丁不得自食其力
人情物理實有不堪爲今之計莫若將松江分司六場
查照原額鹽課銀兩每場各該若干本場竈戶每戶若
干又每丁若干照依徵糧排甲法立爲三限修復松江
分司衙門行令浙江運司官一員前來住劄及時聽令
商人入場收買責令總催比并各竈依限將課銀完納
限內天色晴乾雨溼逐日開記另報運司查驗量爲遲

速課銀未完就於地頭嚴禁鹽貨出場中間若有先自
辦納課銀停鹽待價者聽從其便但遇課銀一完隨即
開報運司并巡鹽衙門各場餘鹽聽令各竈丁自行發
賣或令陸路肩挑背負并水路三板小船各人販賣但
不許挾持軍器及越過行鹽地方大約每年上半年辦
課下半年開禁各竈丁既知餘鹽許令自賣必肯早辦
課銀商人既知餘鹽許容平買必不營求夾帶其餘姦
人亦知餘鹽不禁轉賣必不冒法聚衆興販前項越境
淮鹽無處發賣不禁自止日前一應私販俱可轉爲商

人其諺縣水鄉竈丁亦可因此招回復業增辦課銀漸
補無徵之數如或鹽貨流通價值低賤仍聽竈丁免納
折色俱納本色作爲存積亦可漸復召商開中以實邊
儲或謂私鹽自來有禁不知鹽法自來亦自不同如洪
武年間煎鹽工本在官支給隨其多少俱屬官物其後
鹽課立有定額其外餘鹽亦有本場收貯給與米麥之
例彼時禁賣私鹽一是原領在官工本一是不肯送官
受價罪以私鹽情法猶有可據此後煎鹽工本既不出
於在官竈丁餘鹽又不官爲收買惟獨禁賣私鹽之法

未見處置但餘鹽決無委棄之理鹽徒決有聚衆之勢
官司決難去通縱之弊地方決難免擾攘之患立法之
始本以惠民足國末流之弊遂至爭民施奪誠爲可慮
如蒙勅下該部再加詳議早見施行則民生國計幸甚

應詔陳言疏

明
王朝用

竊惟天下財賦盡出於東南而鹽利尤爲裕民之厚資
天下兵戈多在於西北而糧芻尤爲備邊之急務故以
鹽糧召商報中謂之飛糧輓芻誠爲籌邊至計但引額
原有定數而先後因革不同以臣愚見論之舊額之當

復者其勢有六敢一一陳之兩浙行鹽地方浙江十一府并南直隸五府一州與江西廣信一府國初民間戶口猶少而竈丁亦不甚充足額鹽尚有四十四萬有零近來民間生齒漸繁而竈丁曠丁亦多不惟食者衆而辦者亦衆使不變而通之則民食日見不足竈課日見有餘欲禁其私販亦難矣此其當復者一也先年減半折價解京者以濱竈瀕海易於辦鹽水鄉不諳煎燒易於辦價況辦鹽惟辦本色收貯日久易於消折折價解京亦一時優恤之權宜近年以來不特解京者折價存

三
畱在場者亦多折價聽候給客蓋以竈丁便於輸納無
消耗之累商人易於關支無守候之艱每年解京二十
二萬二千三百八十四引有零每引折銀二錢三分七
釐共該解銀五萬二千七百五兩有零若將價銀收畱
運司額鹽盡數發邊開中就將前價一體給客收買則
商人樂從竈戶稱便且每鹽一引計價四錢在邊倉已
滿八萬八千九百五十三兩之數若并割算餘鹽價銀
計之每一千引三場兼派又該銀一錢共該增解價銀
二萬二千二百三十八兩有零較之折價解京增出五

萬八千四百八十六兩此其當復者二也每年運司額
解折色價銀到部戶部轉運發邊未免限於定期遲以
歲月一時邊報緊急豈能濟事惟此鹽糧勘合人皆爭
先趨赴匪徒神速抑且加倍驛遞免轉輸之苦道路無
剽掠之虞此其當復者三也夫竈丁之煎鹽猶農夫之
耕種耕者所獲除完納稅糧之外自有通工易事之理
竈鹽旣減半折解則納剩餘鹽豈可聽其消耗而不爲
變通之計哉當此之時商人欲收買而限於無引竈丁
欲變賣而畏於犯法此興販之徒接踵而至發運之船

成鯨而來其勢不得不然者大抵天下之利不歸於官必歸於私若官引不足而又於私販是禁忍淡不食鹹味夫豈人情所宜一旦爲人捕獲則又陷於法網夫犯法豈小民之得已哉此其當復者四也各處行鹽地方近來鹽價高貴一則由於上納價值之重一則由於照賣官引之少故利之所在人必趨之雖已嚴加禁治一旦遽難止息大抵源潔則流清此盛則彼衰若使引目既多則一年正商足以盡收竈丁之所獲各處官鹽足以備充民間之食用彼私販者何由用其力而施其謀

哉不惟鹽價得平私販亦不禁而自止矣此其當復者
五也自折價解京之後民食漸覺艱難故先該巡鹽御
史有奏開殘餘鹽者有開賣空額引者又徇引私囚名
色而召納者亦一時補其不足之權宜厚利所在多爲
勢要所有一奉先年明詔裁革殆盡近因執法者查理
過嚴由是小商皆自危矣夫以裁革勢商爲名是已至
究其實則有不盡然者利已歸於勢要而不可出害復
及於小商而不能免財利之際易生嫌疑當事之人率
多辭避孰肯加憐憫之意若使前引盡開小商何至此

極此其當復者六也此額一復則民食自足私販易息
邊儲充實國課不至於缺少商人得利竈丁可免於困
極一事之舉可以兼數事之長乞除已前年分解過價
銀到部者名爲空額與例有礙不開外以後年分有額
課鹽折納價銀存畱運司不必解京每引定價四錢盡
數發邊開中前項價銀聽候商人齎執勘合倉鈔比對
相同一體支領買補掣銷仍照例嚴禁腹裏及京師不
得開賣以杜弊端則地方幸甚商竈幸甚

通鹽法以足邊儲疏

明
蔡經

竊惟邊陲遙遠轉運爲艱故開鹽課使之見利則趨而糧餉易集奈何近日更張未定處置無經俾商人憚於上納邊蓄以之不充姑以其弊概論之昔年鹽課有存積常股之法存積以備急缺而常股則以時開中當地方收成之候糧草價賤商人易於上納故一引之鹽常得二引之用定價每引不過三四錢而無處置科罰之費今則開中之期未必收成之候糧草價貴買納甚艱每引定價八九錢復有設處名色科罰多端乃至費銀一兩五錢猶不足以周一引之用以故近日邊方具奏

鹽引雖開而召商不至良由開中不時行取太過有以使之此則開中之弊一也昔年正額之外不許夾帶餘鹽凡有餘鹽必割沒之固未有餘鹽納價之說也其後所割餘鹽堆積既多而權豪之輩則指以官買爲名因而夾帶以謀大利侵害商賈於是始將餘鹽聽商納價然亦未有反多於正額之數也今則加添兩倍意欲卽添引以照餘鹽而豈知引目多少視夫鹽課而鹽課多少則視竈丁之多寡鹽地之廣狹故必場有實鹽而後派以該場之引執引支鹽有如契券非場本無鹽而罔

之以虛引也且如淮鹽正額不過七十餘萬引今乃添引一百四十餘萬是各場鹽不加多而額外之引乃兩倍之不知執此引而支鹽於何所哉邇者建議雖云聽其隨宜補買掣後納銀而商則終恐費本以中無鹽之引迄今相視莫敢投引又前次中納引一到司卽得支鹽貨賣今於每引之外必加二引使其陸續收鹽乃與正引同掣非惟耽延歲月抑且資本不敷是欲餘鹽之通而反致正鹽之滯納價於腹裏而缺儲於邊方此則添引之弊二也昔年鹽課清掣以時且前後相接價值

常平近年巡鹽衙門多有引嫌避謫不肯依時親掣雖
嘗委官亦有經年累月莫肯任事者以致停泊淹留坐
消資本遂使引鹽地方鹽不能繼價值騰踴此則遲掣
之弊三也夫官鹽通則私鹽自息今有此三弊此官鹽
所以不通邊儲所以不足而強橫射利者則結黨與販
一遇追捕拒敵殺人擾害地方乞如臣等先次具題事
理每年正月務派各邊但遇收成之時聽其召商照依
原價上納本色糧草不許指以處置爲名妄加科罰及
至支鹽應掣則以船到之多寡爲清掣之期程如兩淮

鹽多船至一百隻兩浙等處船至七十隻該司卽便具呈巡鹽衙門委官清掣掣過船隻次數造冊奏繳以備查考至若添引事例雖已施行然有損無裨恐非立法之本意經久之良圖必須再行集議如其不便停之可也

修舉鹽法疏

明 朱廷立

一開草場以資貧竈臣惟鹽法莫先於恤竈而恤竈莫先於興利運司竈丁原有煎鹽草蕩以供之外餘蕩可耕但畏私墾之禁莫敢開耕乞令有司委官丈量每額

鹽一引撥與若干供煎其餘竈丁分給有力願耕者照例免其三年之租以後仍從寬每畝肥厚者科租米一斗磽薄者五升備賑無力不願開耕者聽如有富民猾竈越占侵奪者問擬如律庶幾人無遺力地無遺利而竈丁可無逃移之患也一遵舊制以公秤掣洪武初年頒降銅鈞每個重二百五十斤秤掣商鹽新例商人在邊中鹽一引卽赴運司添中二引每引二百五十斤過所則其輕重固有定數矣乞令運司以銅鈞爲則每所添置銅鈞一個重四十五斤以足二百五十斤之數較勘

相同不差銖兩轉發批驗所永爲遵守如此庶制度定而民用以齊挈法公而人心自服矣一專責任以祛積弊巡鹽御史選委各府衛州縣佐貳官員專緝私鹽各該員視爲具文往往付之首領或巡檢倉大使等官及爲事未結立功未滿帶俸差操等項軍職多不能鈐束下人生事擾民有與巡鹽人役貓鼠同眠交通鹽徒或受其常例縱放或通同販賣分贓船運車載者置而不問而貧難肩挑背負無錢買免者卻行捉拏塞責名雖巡鹽而實則爲白晝之大盜也今後巡鹽官員俱要責

成掌印正官提督兵快設法禁捕其各府正官事繁難兼仍選廉能同知等官專理若遇大夥鹽徒聚眾劫掠許協同巡捕官兵相機撲捕以靖地方如有貧難無力肩挑背負易米度日者不許一概捉拏致擾小民若或仍前更代不常失職廢事者聽各處撫按官及巡鹽御史叅究如此庶幾事體專而官員存盡職之心禁令行而地方無鹽徒之擾矣一定買補以通竈利先年商人添包鹽斤俱是本場買補正德年間勢要縱橫不次挨單便場買補其後因循視以爲常各商輻輳近便場分

買補以省道路工腳之費以致本場勤竈縱有餘鹽商人
不肯收買欲要貨賣又有私販禁例是以勤竈既無
以供煎又無以度日凡遇凶荒悉多逃亾乞令今後商
人買鹽添包務於本場收買納剩官鹽不許別買圖便
各該場官仍按季將放支過商人某人正鹽若干本商
在場買過添包餘鹽若干違例於別場收買若干本場
封出空引若干本場賣與別場商人若干從實申報運
司查考將故行買補商人及越賣竈戶查提到官問擬
徒罪若至二千斤以上者卽引例充軍鹽追入官其該

場官攢交通姦商封與空引縱其便場買補隱瞞不行
實報者事發坐以枉法贓罪如此則鹽法行而姦頑知
警勤竈獲利而流亾之患可免矣

乞酌時宜疏通鹽法疏

明李 磐

看得本色竈鹽浙東浙西派撥均平商竈兩便至於折
色水鄉竈鹽以浙西派數較之浙東三分而加其二似
平不均之甚且前項折色引鹽先年奏例查得竈戶離
場三十里之外因其無鹽准令折價水鄉引鹽又因各
鄉竈戶不諳煎辦亦准照例納銀其名雖曰水鄉引額

俱存在場實於各縣遞年秋糧餘米內包補帶徵非若
海濱竈戶辦納本色鹽斤之比彼時奉派不思及此只
照各場原額派撥令商人領銀買補以致浙西場分鹽
少引多支買不前耽延歲月商人致有違限沒官之恨
浙東場分鹽多引少各竈正課之外縱有餘鹽阻於無
從變賣商人雖有資本苦於無引照買勢終歸於私販
之門矣乞將兩浙運司折色水鄉引鹽原係在場徵納
者照舊徵納在縣包補者照舊包補銀兩俱解運司收
貯至於派場之時不分浙東浙西通融均派截此之有

餘補彼之不足令其買補掣銷庶幾鹽之多者商不患於無引照買而興販可革鹽之少者引不患於違限沒官而開中必先補偏救弊之術誠無出於此矣

陳言地方利弊以裨鹽法疏

明李遂

據台州府知府許繼照得本府地方中津橋東舊設有鹽倉批驗所一處該掣所屬地方黃巖杜瀆長亭三場引鹽後因運發不便商人不願住賣遞年俱於該場支領折色前去別場收買餘鹽充數運赴紹興批驗所掣賣而本所虛設宏治十二年遂將裁革自此本府地方

並無官商引鹽發賣各場並無商人買補該辦鹽銀無從抵納易銀完課每被巡鹽官兵捉拏缺欠鹽價又被分司場官追并且本府沿海一帶產鹽甚多私販之徒縱橫百出官商不通復將私鹽嚴令禁止民間日用至無所資而況縱伊結黨至爲地方貽患耶議將三場鹽課照舊派商支買每引重五百斤秤掣以補過嶺搬運盤費買完之日呈取紹興批驗所官攢前去中津橋掣放等因據此竊惟有場則有竈有竈則有鹽有鹽則有引有引則當派商支鹽未有既設場竈責令辦納鹽價

而不派商買補乃復禁其私賣者也蓋無買補則竈丁徒勤於辦鹽有折色則折色必出於私賣既派其折色矣而復禁其私賣則衣食尚無所資而鹽課何由辦納耶是故欲禁其私賣非免其折色不可也欲不免其折色非爲通其積鹽不可也況官鹽不通之地淡食者不可一日而無鹽斥鹵不毛之地濱海者不可以一日而不鬻反覆思之誠有不可以不處者就經備行兩浙運司查議到臣竊惟該所批驗雖爲官商不便而廢三場圍竈不爲官商不便而改鹽課依然煎燒如故以官商

言之買補則在他處折色則在該場以官竈言之買補
既無官商折色必資私販是以私鹽之多難與他府同
日語也況國初竈丁辦鹽一引給工本鈔二貫五百文
今工本已無必私煎鬻別無生計若不早爲計處竈丁
逃移日多鹽課逋欠日甚商人守支日見艱難阻塞邊
儲之患未必不由於此行據該府查得黃巖杜濱二場
販鹽民竈俱由總路中津橋經過長亭場販鹽民竈俱
由總路海游石馬林白嶠三處經過其海游附近寶澳
巡司石馬林附近曼澳巡司白嶠附近越溪巡司中津

海游石馬林經過鹽斤復由總路白水溪清溪鎮二處經過運至臨海仙居天台新昌嵊縣東陽義烏永康縉雲等縣地方發賣白嶠經過鹽斤運至寧海縣發賣前項縣分官商既不願住賣合順民情從宜區處行令沿海竈戶軍民人等但於三場煎販鹽斤者委官在於中津橋海游等處收稅不分船裝肩挑每百斤稅銀二分給票照往白水溪清溪鎮寧海委官處盤驗明白責令發賣如此每年計其稅銀可得千兩等因前來臣依擬委官各於前項地方收稅收票其票臣參倣引目式樣

發仰該府依式刊刻編寫察院字號差人呈送臣處用
印齋回轉發收稅官員如遇販鹽之人運鹽到彼照數
秤收稅銀將票填給認賣地方前到收票官處投驗發
賣其票按季交府查銷轉送臣處查考自嘉靖十五年
五月起至十二月止收過稅銀二千二百八十六兩已
解戶部銀一千一百二十八兩餘存運司類解又經督
同兩浙運司運使黃行可溫台分司判官夏祿等面議
皆稱經久可行但無委官并該場比號稽查之法未免
日久弊生臣復參考官商盤驗法則行令該府將票中

畫格眼每一場置立內外號簿各一扇每一扇編寫號票一千張內號簿編寫運司字號外號簿編寫察院字號通送運司將內號簿用該司印信外號簿呈送巡鹽御史處用印完備通發該司轉發該府照前經過去處號票發與收稅官內號簿發場外號簿每一扇編寫天地元黃字號每收票官一員發與一扇各收掌每票一張買鹽三百斤每百斤稅銀三分如某人要往黃巖場買鹽三千斤認往仙居縣發賣先赴中津橋委官處告納十票稅銀給票前去該場比對字號相同聽令買鹽

完日赴場驗明將票截去第一角號簿并格眼內填寫
某月日出場訖運至中津橋報官秤鹽明白截去第二
角格眼內填寫某月日盤驗訖定限某月日前到該縣
地方發賣運至白水溪委官處比對字號相同秤盤明
白截去第三角號簿并格眼內填寫某月日盤驗訖其
票并各號簿填完繳府轉送巡鹽御史處查各該委官
驗有夾帶影射洗改并違限日久及不行投稅無票照
證者同私鹽法若雖經投稅越往官鹽縣分發賣者比
照越境事例充軍各該委官如有陞遷事故俱候委官

交代方許離任其肩挑背負者照舊止在報稅官處每
百斤納稅銀三分給票照賣不在比號盤驗之例如此
庶可行之久遠而無弊也臣維茲台州三場鹽法自官
商不支之後親見其病有四自臣議處之後親見其利
有六所謂四病者何也官鹽不通私販盛行一病也竈
丁日見逃移催目苦於賠贖二病也折色累年拖欠商
人節告守支三病也禁捕雖嚴徒爲積捕詐財肥家之
計四病也此臣親見者也所謂六利者何也舊日台州
府掣獲私鹽船物銀兩不過三四十兩今方議處半年

新增稅銀二千二百八十餘兩若至一年無慮三四千兩國課又增一利也貧竈公有折色之資私有養生之計二利也商人無守支之苦邊儲足飛輓之計三利也稅法甚使人皆樂從沿海貧民經營有路地方無鹽盜之縱橫海洋消未萌之禍患四利也捕兵人役不得倚法爲姦而禍延良善五利也衣食鹽課之有資而逃竈日見復業六利也此臣所親見者也乞令巡按御史遵守施行

議加稅疏

明
劉廷元

熒竈積困異常加稅貽累非法懇乞聖明推廣慈詔俯
允鹽臣之請盡蠲額外之徵臣竈籍也竊聞國初版籍
有竈非赤子之所樂從也蓋毆之使就者也一隸其籍
便責以課不得不計所供之稅惟是廣漠斥鹵人跡不
到之地蛇虺錯出之區而皆熒熒蚩蚩之黎弗顧死亾
委身出入其間徼有天幸稍藉煮煎以給課額倘不逢
年將畢軀命以徇之矣祖宗朝計其丁而課其稅卽按
戶而撥以蕩誠惻然哀矜此輩焉乃所受之蕩一望荒
邱寸草不生者耳自若輩戒心於惟正之輸於是擢其

稍與郊原相通而人畜可至者爲之鑿渠畫徑以汰沙礫以闢荒蕪或有草萊之樵採然而十不得一也間或有麥稼之播植然而百不得一也卽原額稅課尚不能充乃邇年來邊商庫價無償當事持籌未有成畫下之轉運使無柰奉行者非其人也憚於履畝惟知任耳以爲目喜於炫能不難飾假以成真任猾胥之爲政也甘心於虐下罔上而不顧憑暗裏之申文也衆竈雖呼天搶地而罔聞當是之時齟臣方無計蘇商而所司借商以口實矣齟臣亦付之無可柰何而一種萬不得已光

景且津津原疏中矣詳味全疏語意亦止紓商人口前之急不欲貽竈丁日後之憂此又饒臣惠愛極恩差逆睹其弊而預爲防者臣猶記比時申文有各場新漲沙地種成桑麻者概行加稅之說執途之人問之凡竈蕩皆頑土也有畛限者也安從漲乎凡沙地皆瘠壤也不能生息者也安所種桑麻乎哀此貧竈也丁有課催有役熟蕩有稅荒蕩有稅舊額旣去竭澤無遺幾至剝膚復加無名之徵而曰新增稅也將所恃以賠此者從天降乎而天不聞雨粟從地出乎而地不聞湧金鬻妻孥

乎而生齒有限朘削已窮則相引而逃耳逃之不得有
率而亂耳夫至於逃亂并前此之課額誰爲辦納後此
之軍興益費躊躇非由加稅開之釁而稔之禍耶伏覩
商賈挾持貨物徵逐厚利稠疊而稅之猶嫌厲禁也皇
上且蠲三分之一以沛汪濊田畝歲多樹獲計壤而賦
之業有定制也皇上且遇災量免之以恤凋疲矧無衣
無食之甯代鹽商賠償是池魚之殃也其無辜爲何如
矧不耕不耘之蕩而稅更有加是無米之炊也其可憫
爲何如不平則鳴勢極必反究將何止宜鹽臣拊膺於

額號之聲蹙額於仳倚之狀而請皇上之允其減也豈
諸臣有所私於兩浙熒竈豈諸臣不欲爲皇上存此一
隙利孔夫亦曰額內之徵猶當緩二額外之取豈宜四
出民命堪憫也民變可虞也善爲國謀不得不從長酌
議茲者聖母遺詔諸蠲卹德意皇上善承曲體斷然施
行而無藝之徵爭民之事損國法而離人心者莫如兩
浙新陞蕩稅其從免革不待臣詞之畢矣伏惟聖明軫
念商有業竈有役不相假也商有商之苦竈有竈之害
不相貸也舊稅科索已盡貧竈脂髓已殫那堪新增分

毫乎立賜全免可以宏仁亦可以廣孝可以弭患亦可以迓福也億萬之歡呼頌祝悉聚而爲皇上岡陵昌熾之休曾何有於二萬金錢哉

覆兩浙餘鹽五疏

明 葉永盛

第一疏

題爲浙課甚微邊儲最重乞燭羣姦欺誑急行罷遣以裕邊計以保宗社事臣聞九邊者京師之藩籬儲餉者九邊之命脈故必九邊固而後京師安尤必儲餉足而後九邊固鹽法者所恃以餉九邊固藩籬以擁京師者

也臣見近時羣小如田應璧吳應基等欺君妄奏致兩淮蒲解之間鹽法大壞方不勝扼腕幸而兩浙晏然無事乃近閱邸報見忠義右衛百戶高時夏一本爲遵照見行事理疏通鹽法裕課便商事奉聖旨這本奏內浙福等處鹽場累年積蓄鹽堆及壅塞引目疏通變價每年約有銀三十萬兩有裨國用准著浙江督理稅務內官劉成福建督理礦稅內官高案不妨原務帶管彼處督率原奏官商土民前去會同各該撫按等官查理銀兩解進不許擾害地方欽此臣一見之不勝駭愕夫福

建鹽利臣不能知請言兩浙浙課歲額解京銀一十四萬兩給邊商銀約九萬七千總計共二十三萬七千兩之數然此二十三萬七千者不盡出於鹽也內沿海沙地之稅及竈戶丁口之稅諸項總計凡十四萬有奇其爲鹽引紙價者約不過九萬而已夫以額課尚不過九萬而謂有餘鹽乃可獲一二十萬之多乎其爲欺誑不待辨而明矣然使此課銀九萬者歲歲無缺猶可支給然而不能也兩浙行鹽其五十萬引行鹽之地僅十六府一州內杭嘉湖松紹寧台溫等八府皆近海出鹽之

地彼小民近取諸海卽可以供食肯捐囊金以貿鹽乎
雖刀鋸日加鞭扑日施欲官鹽之如數買銷此萬萬不
能則所恃以完此九萬之課者僅金衢等七八府彈丸
之地而已夫行鹽之地旣狹則買鹽之人自少以故引
目壅塞而課銀往往短少解京不敷不得已而那借給
邊商之民以湊解致使邊商坐守四年尚未領價是現
在課銀尚若不給日凜凜有掣襟露肘之虞而謂此外
復可得餘鹽銀一二十萬乎其爲欺誑又不辨而明矣
大抵行鹽止有此地方食鹽止有此人數縱使餘鹽果

如山積而足食之外皆無所用亦必不能於額課之外復行餘鹽而況邇歲陰雨連綿竈戶煎辦不前商人坐場守支有年餘不得鹽者今諸姦乃云餘鹽如山堆谷積原此輩之意不過欲得皇上一俞旨輒分布諸場占據鹽利私賣私販任其縱肆各飽私囊不知此輩之計一行則額引盡行停閣引課盡行虧缺彼商人捐膏血以輸之九邊不遠萬里而來乃竟不得分毫鹽利而歸有挾貲掉臂而去耳誰肯復輸芻粟於邊哉夫邊無芻粟軍士奚食恐九邊之變不旋踵而起而藩籬旣壞腹

心併危禍且移之內地矣伏惟垂神三思加意邊儲將臣疏勅下戶部查議亟停高時夏等之遣庶鹽法不壞而饋餉充藩蔽無虞而內地固商民幸甚社稷幸甚

第二疏

題爲浙鹽餘積毫無妄奏大千祖制乞勅會勘以明虛實事頃該忠義右衛百戶高時夏奏開浙福餘鹽山積變價歲可得三十萬臣聞報驚惶業已具疏齎奏其時未見原奏官條議尚未及詳斥其姦方在候旨未下復見高時夏又有條陳末議清理鹽法之奏奉聖旨這奏

內令行事宜著浙江督稅內官劉成福建督理礦稅內
官高宗督率原奏官商土民各分所管地方會同撫按
等官酌議而行欽此臣當靜聽會議何敢復贅顧事關
職守有不容默默已者據時夏條議疏中狂悖無狀不
可縷數姑摘其姦欺之大者爲皇上陳之臣查得大明
律開一款凡犯私鹽者杖一百徒三年鹽貨並入官若
知情故縱者同罪今時夏條議謂欲沿途盤詰凡與販
無引私鹽者較其鹽數若干量酌小稅給票放行是私
販者不杖不徒不沒官明知之而故縱之使私鹽公行

官鹽將盡廢也有是理乎又查得大明律內一款凡將有引官鹽不於拘該行鹽地面發賣轉於別境犯界貨賣者杖一百其鹽入官今時夏條議謂有越境販賣者照前私鹽例給票收稅是越境者亦不杖不入官反明給官票令之肆行使額引盡停而國課盡缺也又有是理乎夫大明律乃高皇帝親定後世人臣誰敢毫髮更易而況鹽課一節尤邊儲國計所關今時夏欲縱私販縱越境不知有大明律不知有皇上之法又不知有高皇帝舊制矣又據條議內欲將各場堆積等鹽招商變

賣夫兩浙出鹽之地原少故額引不及兩淮四分之一
加以邇時水旱不時竈戶逃竄海波衝決竈地傾頽鹽
之所出日少故在窮竈則鹽未煎而先那商價以餬口
在各商則引預告而待竈鹽以應掣東移西湊額鹽尚
若不充又何從得餘鹽所有者不過商人價買之鹽貯
於各倉或貧竈煎熬之鹽候給與官商者耳時夏輩豈
不明知而敢爲無影之奏無非欲僥倖明旨之一降卽
分佈諸姦下場強霸或指官商已買之鹽爲餘鹽或指
貧竈待賣之鹽爲餘鹽廣招私販賣價烹分各厭其腹

耳此計一行則舉官商間關萬里之資盡爲若輩所奪勢必裹足遠去莫肯輸粟於邊而邊兵擾攘之禍立見舉貧窳勤苦度日之需盡扼喉而奪之而海濱數萬之衆無所控告勢必嘯聚跳梁而東南之事有不忍言者矣臣查浙課除地丁稅之外僅九萬而餘鹽之數視正額不啻加倍即使化土爲金萬無充解之理時夏旣云餘鹽山堆谷積此則有目者所共見必不以囊袖藏者乞卽勅原奏官指引山堆之鹽在於何縣何場所謂鹽堆之上樹株茂密合抱森森者在於何處著令撫按等

官同臣及督稅內官看驗果如原奏官所云則欺君之
罪在臣臣甘伏斧鉞之誅如其果虛乞念邊防大計祖
宗二百餘年相守成規亟停按括則鹽課不虧而儲餉
已足詎獨微臣及商民之幸實宗社無疆之休也

第三疏

題爲浙鹽餘積毫無妄奏大違祖制乞勅會勘以明虛
實事萬歷二十八年二月二十日奉都察院劄付該臣
題前事等因奉聖旨原奏官高時夏等具奏浙福二省
餘鹽山積變價歲可得銀三十萬兩已有敕旨著內官

劉成高案會同撫按各官酌議解進這本說餘鹽絕無
果否虛實還著內外官員公同查議明白奏請定奪立
限與他該衙門知道欽此欽遵移咨轉行兩浙巡鹽御
史會同巡撫并內官劉成遵照明旨內事理查議明白
定限三月內回奏施行到院奉此案行三司從公會查
要見兩浙額鹽若干歷年是否足額額外是否有餘餘
鹽有無山積近議行銃毀舊引有無窒礙等因蒙此已
經備行鹽法道并兩浙運司查議去後隨據運司蘇養
蒙呈稱兩浙四所每年額派引鹽四十四萬四千七百

六十九引內除溫州所引目二萬一千五百八引隨到
隨掣不開外今查杭嘉紹三所年額派引四十二萬三
千二百六十一引自萬歷十九年起至二十八年春季
止通計九年零一季共該掣銷引鹽三百九十一萬五
千一百六十四引今查歷年以來通共掣過三百二十
二萬五千九百七十九引較之年額實欠掣六十八萬
九千八十五引仍有額外預告未掣者共八季實計缺
鹽通共九十九萬一千五百五十七引設使竈有餘鹽
何不給賣於商而停引不掣商有鹽收又何不照引買

運而困守數年餘鹽之無不待查勘而自明矧有各場
官攢印結歷歷可數再照引以行鹽鹽以銷引鹽既不
足致額引之欠銷又欲廢引兼行將引目之益壅引既
壅積致額課之難完又欲課外加增將額供之益缺九
邊從此枵腹商竈從此離散等因又准鹽法道右參議
林汝照咨稱覆查無異會議相同等因到臣臣等猶恐
不的復親往許村場逐一踏勘但見窮竈釜空灰冷極
目蕭條毋論山堆谷積卽稍有煎熬之鹽皆預那商價
餬口鹽未出鍋而商人已守而索之矣正謂二月買絲

五月糶穀言之殊可酸鼻勘後臣復會同巡撫浙江都察院左副都御史巡按浙江監察御史內官監右監臣反覆參酌查看得原奏官民所稱餘鹽者乃額外多餘之鹽也今查浙課四十四萬四千七百六十九引年年銷不及額積之九年共缺鹽九十九萬一千五百五十七引是額內方苦不足額外何得有餘果有餘彼貧竈何不變賣救饑而甘心枵腹以待斃商人何不買收營利而甘心困守於數年餘鹽之無誠不待勘而可決者況臣等親臨踏勘絕無影響是鹽旣無餘課難加額欲

遂丐天恩停免但內官以爲明旨森嚴何敢以空文覆奏必欲多方設處以稱上心乃按查運司積有遠年廢引計數一十五萬有奇謂可變價解進臣以爲引特一空紙耳有引無鹽卽引如山積將安用之況廢引數多一時並行則額引盡壅邊餉何供內臣必不肯已臣仰體聖意雖明知事體窒礙不敢不委曲允從乃聽內臣徧按各場得見煎額鹽約可變價一萬五千餘兩將前廢引扣數給商完課解進外而內臣又執稱各省運司如河東兩淮之類皆有歲解額課欲比例措辦臣等以

爲浙鹽原與他處不同他處之鹽或以風吹日曬而成不甚費人力浙鹽全賴煎熬人力百倍欲加額課商竈何堪似難比例內臣堅執不從臣勢不能強反覆計籌求所以措處之策不過曰裁省與加派二者而已查得臣衙門諸役例有工食及出巡一切公費皆勢之必不可無者臣爲鹽官若不躬自節省而徒加派於商竈何以服輿人之心臣將前項逐一裁減約可得千餘金再查濱海新墾地畝或地腴而稅輕或已熟而未稅量行加派及天賜場新增鹽課并鹽牙稅銀共前四項約六

千兩此外將前扣餘廢引那借額鹽行賣足課一萬兩
廢引既完卽於各商照引加稅各竈照戶加煎湊足前
數共稅額一萬六千兩臣自謂殫竭心慮計盡而無復
加矣乃內臣復堅欲加課一萬兩湊額二萬六千兩原
內臣之意不過欲効勞皇上爲國課求增第課愈多則
加派愈重在商竈損此一萬不啻去骨中之脂髓在內
府增此一萬何足益滄海之分毫況鹽務關係邊儲最
爲重大區區兩浙煎鹽祇有此數增一萬國課必減一
萬邊儲積之數年當缺一年之餉異日九邊年例不敷

戶部復有內帑之請未免更煩聖慮則又不若及今裁酌而畱不盡於邊儲之爲得也伏惟皇上垂神三思如果念邊計甚重商竈難堪得停掇括上也倘以爲國用必不可已容臣歲辦額課銀一萬六千兩准以本年三月初六日敕書到日爲始按季徵解以濟大工俟工完日卽止則兩浙商竈雖不能盡徼停免之恩猶所謂寬一分得受一分之賜倘俞內臣所奏必欲歲額二萬六千兩臣藐爾犬馬誠不敢違天恐自此而商竈愈困邊計愈虧其害有不可言者惟聖明裁奪臣無任籲鳴祈

懇之至

第四疏

題爲會疏明旨未頒商竈離散可慮乞查近奏速賜允
行以安人心以充國課事近因忠義右衛百戶高時夏
奏稱浙福餘鹽山積歲可變價得銀三十萬兩奉聖旨
這本說浙江餘鹽絕無果否虛實還著內外官公同查
議明白奏請定奪立限與他該衙門知道欽此欽遵會
同撫按內臣同將歷年掣鹽引目查算及親詣各場踏
勘餘鹽委係絕無但明旨森嚴不敢以空文覆奏臣曲

從內臣之議將運司銃廢引目變價一萬五千餘兩先行解進外復因歲課無辦議加派裁省諸項以湊額供之數在臣則議歲額一萬六千兩內臣則議歲額二萬六千兩撫按二臣則酌乎二者之間議額二萬兩已於四月十五日公同會稟具題迄今未蒙裁定續接邸報見內臣於本年二月間有條陳二疏至本月十三日奉聖旨這奏內應行事宜遵照前旨會議而行毋虧原奏銀兩額數亦不可因累地方原奏官高時夏領敕已經四月如何尚未齎到爾便嚴查上緊奏來定奪不許容

縱該部院知道欽此皇上於臣等會疏則遲遲未允而於內臣條陳之疏則有毋虧原奏額數之旨者以原奏兩浙該課十五萬兩而臣等所議乃若是之少或以臣等之勘議未必實而餘鹽絕無之說未必真耳夫兩浙餘鹽之有無皇上誠不得而親見若夫浙課解部濟邊歲止一十四萬載在會典其書見在御前可取而覽也夫舊課止一十四萬兩而今新奏餘鹽之數乃至十五萬兩是餘鹽比正課反加多一倍有餘矣即使將解部正課盡解進內府尚缺一萬之數無從措處況部課係

九邊年例急如星火可盡解內府否乎部課十四萬既
不可缺而奏額十五萬又欲足數卽粉商竈之骨能足
乎不能足乎且兩淮河東與兩浙同一鹽課也兩淮解
部六十萬解內府者近議一十二萬河東解部解邊共
一十九萬八千解內府者近議不及三萬是在兩淮則
舊課十分新進者止十之二耳河東舊課十分新進者
尚不及二分然彼二處鹽臣業已措處無策哀籲屢屢
矣今兩浙若無虧原奏額數是舊課十分而新課尚溢
十分之外較之兩淮河東加重六倍矣臣非能神運鬼

輸如之何能充額也臣屢請明旨皆云無虧國課亦不
許妨損邊餉今若求足原奏十五萬兩則邊餉必至全
無不特妨損而已今兩浙商竈自去年十月聞報以來
皆紛紛傳言朝廷將加倍派徵不勝驚懼各欲棄業逃
散商不買竈竈不煎鹽已半載矣近因會議一疏人心
稍安倘皇上復欲無虧原奏額數則商竈驚惶如故將
來商必挾資遠去竈必流離思亂不獨內供無措部課
無出而濱海岌岌之勢且在目前矣此等景象皆內臣
所親見臣非敢有一言虛妄以欺天聽也伏乞皇上俯

念浙課止一十四萬必難加倍查照兩淮河東事例并細查臣等近日會議之疏參酌聖心速賜批發明旨早降一日則地方商竈早安一日臣等亦便於遵行而國課邊儲兩無誤矣

第五疏

題爲會疏未蒙裁定解銀未見賜收乞速降明旨以定人心以便遵守事臣奉旨會議兩浙鹽課與撫按內臣同日具疏上奏并先將廢引變價銀一萬五千二百五十兩付內臣隨數解進迄今待旨三月有餘而會疏未

蒙批發銀兩未見查收臣等不勝惶惑夙夜疑慮不知前銀竟置何地縱內臣以爲已解進內府而無明旨可憑臣等孰從而信之又查兩淮河東等處凡係鹽課皆荷聖慈軫念邊計並從寬恤獨兩浙會疏未蒙批發或者以原奏一十五萬而臣等所議太少故聖意難之耶然臣等之議非漫無憑據乃查照兩淮河東事例而稍增損之者也兩淮解部者舊額六十萬近議解內府者一十二萬河東解部濟邊者舊額十九萬有奇近議解內府者不及三萬屈指兩處之數大約舊課十分新課

僅二分且有不及二分者浙課解部者舊額止一十四萬不惟不及兩淮亦不及河東內臣所議之數正與兩處事例相合臣等以浙鹽煎煮甚難尚欲求聖意寬減若必照原奏之額取盈一十五萬是新課與舊額反多一倍有餘較之兩淮等處輕重苦樂天淵懸隔卽汾商竈之骨萬萬無完理矣夫天下之商竈皆皇上之赤子天下之鹽課皆皇上之邊儲各處皆蒙寬恤豈於兩浙而獨加倍追徵在聖明必不其然然聖斷一日未發則臣等一日無所遵守地方商竈卽一日不得寧靜勢必

廢棄逃竄轉而之四方此其關於國計民儲非細也伏
望皇上查照兩淮等處事例及將臣等會疏參酌多寡
批允額數下部行臣以便遵守至於內臣已解銀兩有
無收進內府明降聖旨俾臣等曉然共知庶渙汗頒而
羣疑釋宸斷定而人心安國計邊儲並有賴矣

欽定重修兩浙鹽法志卷二十七終